



**PRIMEIRO
MINISTRO**

**DISKURSU SUA ESELÉNSIA
PRIMEIRU-MINISTRU REPÚBLIKA DEMOKRÁTIKA TIMOR-LESTE,
DR. RUI MARIA DE ARAÚJO,
IHA BIBAN SESAUN ENSERAMENTU
KONGRESU NASIONÁL DA-3º KONA-BA EDUKASAUN**

**“Edukasaun nu’udar rin haforte Identidade no Dezenvolvimentu Nasaun
nian”**

Díli
17 maiu 2017

Eselénsia

Señor Ministru Estadu, Koordenador Asuntu Sosiál no Ministru Edukasaun

Señor Vise-Ministru Edukasaun

Membru Parlamentu Nasionál no kolega membru Governu sira

Señor ex-Titulár pasta Edukasaun nian iha Timor-Leste no ex-Ministru Ensinu Superiór Cabo Verde nian

Reverendíssimu Padre no Reverendíssima Madre sira

Esmos. Señor sira

Reprezentante Korpu Diplomátiku no parseiru dezentvolvimentu

Reprezentante Konfisaun Relijioza no Sociedade Sivíl sira

Magníficos Reitores das Universidades de Timor-Leste

Profesór, inan-aman, profisional edukasaun no alunu sira

Oradores e moderadores

Señora no Señor sira

Di'ak tebes bainhira ita kontinua haré uma sei nakonu iha remata Kongresu ida ne'ebé la'os partidu nian. Hanesan bain bain kongresu partidu nian sira halibur ema barak liu fali kongresu hirak seluk. Maibé ida ne'e hakarak dehan deit katak ita hotu sai partidáriu ba polítika kona-ba kualidade ensinu iha Timor-Leste.

No tanba ita iha ex-titulár sira hosi Ministériu Edukasaun hosi Governu oin-oin, hosi kuadrante polítiku oin-oin maka ida ne'e hanesan testemuñu katak edukasaun ne'e suprapartidária.

Ha'u hahú ho agradese ba Ita Boot sira hotu, la iha exesaun, ba servisu ne'ebé maka Ita Boot sira hala'o ona durante loron hirak ne'e iha Kongreso Nasionál da-3º kona-ba Edukasaun ne'ebé maka ohin remata ona. Maibé ha'u mos hakarak agradese tanba servisu ne'ebé hala'o tiha ona molok Kongresu ida ne'e, hahú iha besik tinan ida liu ba, no sai tiha ona hanesan baze ba diskusaun no troka ideia hirak ne'e, hodi kulmina iha konjuntu rekomendasaun ida ne'ebé tama ona iha Deklarasaun Finál Kongresu Nasionál da-3º kona-ba Edukasaun, ne'ebé foin lee ho lian maka'as.

Servisu ne'ebé funsionáriu públiku sira hala'o iha edukasaun sai hanesan determinante no karik nia la iha maka ita sei la iha "Diagnóstiku kona-ba área-xave 6 iha setór edukasaun nian", ne'ebé apresenta ho forma klaru no susinta hosi Señor Ministru Estadu, Koordenadór ba Asuntu Sosiál sira no Ministru Edukasaun nian, iha loron da-uluk Kongresu ne'e nian.

No hanesan Ita Boot sira hatene, diagnóstiku ne'e importante tebes. Diagnóstiku ida ne'ebé halo ho didi'ak nia sai importante liu, ha'u bele dehan katak sai vitál, tuir ha'u nia haré hanesan ema médiku ida. Iha medisina, buat ida da-uluk maka ema médiku ida halo maka avaliasaun, ka análize krítiku ba sintoma sira, ba buat istória nian no ba rezultadu hirak empíriku hosi ezame fíziku no ezame hirak komplementár, hodi to'o ba diagnóstiku ida no

hodi tenta mos, karik bele, atu hatene kona-ba saida maka provoka problema saúde ida ne'ebá ne'e atu, ikusmai, bele apresenta proposta ida efikás iha terapia nian.

Diagnóstiku klíniku maka buat ida importante liu atu halo iha siklu atende ema moras ida, maibé mos, buat ida susar liu atu halo no dala barak labele sés-an hosi subjektivizmu. BuatBuat ida dehan *leges artis*, ka másima hosi prátika hirak di'ak, fo hatene katak karik la iha diagnóstiku ne'ebé hala'o ho di'ak maka sei la hetan terapia ida efikás.

Hanesan ne'e mos, iha diagnóstiku sosial ida hanesan Edukasaun, karik ita la identifika ho objetivu no realista ba problema ne'e, maka ita sei labele to'o ba solusaun ida efikás no, atu koalia lolós deit katak, realizmu no objetividade dala ruma la hola parte iha virtude prosesu diagnóstiku sosiál nian sira.

Diferensa, ho ninia ressalva sira, entre diagnóstiku hosi ema médiku ida ho diagnóstiku ida iha área Edukasaun nian maka bele dehan katak Saúde, iha kazu maioria nian tenke halo ho lalais, maibé diagnóstiku iha Edukasaun ladun di'ak atu hala'o ida ne'e ho estilu emerjénsia médika nian, maibe tenke halo iha tempu ne'ebé util ba ita nian sosiedade, ho possibilidade atu korrije saida maka la bele kombina ho efeitu hirak ita hein atu hetan hodi bele alkansa saida maka sai hanesan ita nia vizaun relasiona ho edukasaun ba ita nia povu no ba masimiza ninia potenciál.

No ida ne'e maka Grupu Tékniku sira, ho forma responsável no inkluzivu, tenta ona atu iha área Edukasaun nian. Ba kada área-xave nen ne'e, hala'o tiha ona avaliasaun ida kona-ba sira nia komponente oin-oin, analiza tiha ona pontu hirak forte no hala'o tiha ona levantamentu ida kona-ba pontu hirak fraku, hodi rekoñese dezafiu hirak ne'ebé sei subsiste hafoin hetan tiha progresu sira hotu, no hato'o tiha ona rekomendasaun hirak atu bele korrije nian.

Eselénsia
Señora no Señor sira

Ita simu proposta hirak hato'o ona iha área Kurríkulu Nasionál Ensinu nian; kona-ba jestaun no formasaun ba profesór sira; kona-ba administrasaun no inspesaun eskolár; kona-ba infraestrutur sira, ekipamentu sira no rekursu ba edukasaun nian sira; kona-ba jestaun ba Ensinu Superiór públiku no privadu; no kona-ba partisipasaun inan-aman nian sira, comunidade nian sira, setór privadu no parseiru hirak seluk.

Ita rejista ona rekomendasaun hirak relasiona atu ho uza dalen ofisiál sira bainhira sai hanesan veikulu komunikaun, edukasaun no tranzmisaun koñesimentu nian sira, no kona-ba atu harí Konsellu Nasionál Edukasaun nian ida ne'ebé bele afeta Komisaun Sientífika Espesializada ida.

Kona-ba dezafiu ne'ebé relasiona ho formasaun ba profesór sira, Ita Boot sira nia rekomendasaun sei sai hanesan atu bele estuda possibilidade iha habelar CAFE, atu aliña formasaun inisial ba profesór sira ho Kurríkulu Nasionál, atu estabelese polítika ida kona-ba jestaun ba formasaun kontínua no atu halo remata diagnóstiku nasional ida ne'ebé bele

hetan hanesan rezultadu maka nesesidade hirak kona-ba formasaun inisiál no kontínua ba profesór sira.

Administrasaun no inspesaun eskolár karik bele sai di'ak liu tan bainhira iha programa ida padronizadu kona-ba formasaun ba ema profisionál sira ne'e no padraun ida ba Administrasaun no Jestaun Eskolár ba nível hotu-hotu ensinu nian.

No karik bele sai mos conveniente atu hala'o diagnóstiku ida kona-ba infraestrutuera eskolár hotu-hotu hodi estabelese mos numeru ida mínimu hosi infraestrutur no ekipamentu eskolár sira, hanesan biblioteka, laboratóriu no kantina sira, no seluk tan, no, importante mos atu halo manutensaun ba infraestrutur hirak ne'e atu bele apoia kondisaun hirak ba ita nia alunu sira nia aprendizajen.

Iha área-xave hirak ikus, karik importante atu diversifika oferta iha Ensinu Superiór, hodi fo, hanesan ezemplu, prioridade ba nível ensinu Politékniku, no atu promove partisipasaun hosi Asosiasaun inan-aman nian sira, nune'e mos hosi parseria eskola privadu no públiku nian sira ho Kreda Katólíka, ne'ebé sira kontribui la'os deit ba formasaun akadémika maibé mos ba formasaun moral ita nia estudante nian sira.

No ida ne'e hanesan rekomendasaun ruma hosi rekomendasaun hamutuk 35 ne'ebé maka hato'o ona iha Deklarasaun Finál.

Eselénsia
Señora no Señor sira

Edukasaun, tuir ha'u dehan ona iha ne'e iha biban Sesaun Abertura nian, maka prioridade nasional no interese komún ida, hanesan dala balun ita dehan, "valór ida ás liu", ne'ebé proposta hirak mosu hosi Kongresu ida ne'e bele sai nu'udar kontributu ida atu nune'e bele alkansa meta hirak hosi faze da-2^a implementasaun Planu Estratéjiku Dezenvolvimentu 2011-2030 no mos Objektivu Dezenvolvimentu Sustentavel 4 - atu asegura edukasaun inkluziva no ekitativa no ho kualidade, no atu promove oportunidade hirak ba aprendizajen durante moris tomak ba ema hotu.

Rin ida Nasaun nian, hanesan Edukasaun nu'dar rin, sei la bele haforte hosi leron ida ba leron seluk no hanesan ha'u hatetn ona ita nia Maun Boot, Dr. José Ramos-Horta, mos iha leron da-uluk eventu ne'e nian nia dehan, "Edukasaun sempre iha setór hirak problemátiku liu, la'os deit iha país hirak ne'ebé sei desenvolve maibé mos iha país hirak forte ona."

Kongresu ida ne'e kumpre tiha ona ninia propózitu, no liu hosi diskusaun ida saudavel iha ninia debate hirak temátiku kona-ba saida maka sai hanesan interese nasional maka nia halo ona proposta terapêutika ida.

Nune'e Governu, liu hosi Ministériu Edukasaun, sei halo buat hotu-hotu atu haklake iha nível nasional Deklarasaun Finál hosi Kongresu Nasional da-3^o kona-ba Edukasaun to'o remata ninia mandatu, hodi mos kompromete an atu informa ho didi'ak ba Ezekutivu oin mai kona-ba importánsia hosi rekomendasaun hirak ne'e.

Molok atu despede, ha'u hato'o dala ida tan ha'u nia rahun kmanek ba Komisaun Organizadora, no ba hotu-hotu ne'ebé hola parte iha grupu tékniku, tanba ho forma profisionál no responsável sira hala'o ona servisu sira.

Ha'u agradese mos ita nia país irmaun CPLP nian, liu-liu Portugal no Brasil, tanba apoia bebeik, no mos Kuba, Koreia Sul, Austrália no Nova Zelândia, Estados Unidos Amérika, Japaun no parseiru dezvoltimentu hirak seluk iha setór ida ne'e, hanesan UNICEF, UNESCO, Banku Aziátiku Dezenvolvimentu no Banku Mundiál, hodi halo votu atu Edukasaun iha Timor-Leste bele kontinua sura ho Ita Boot sira nia apoia.

Ha'u hakarak mos aproveita biban ida ne'e atu hato'o rahun kmanek ba Povu Timor tomak no, liu-liu, profesór, profisionál edukasaun, estudante, inan-aman no enkarregadu edukasaun, tanba selebra ona aniversáriu ba da-15^o Restauraun ita nia Independénsia nian.

Ita la'o hamutuk tiha ona iha durante tinan 15 nia laran nakonu ho susesu maibé mos ho dezafiu sira, no ita hein katak ita nafatgin hamutuk no perseverante, ida dalan tutan ida ne'e hodi lori ita ba Timor-Leste ida prósperu, hamutuk ho timor oan hirak kultu, bele konfia, produtivu no útil ba família, ba comunidade no ba Pátria.

No ho ida ne'e, molok atu ha'u deklara Kongresu ne'e taka ona, hato'o dala ida tan mote hosi Governu Konstitusionál da-VI, hodi hatutan tan parte ida ne'ebé temi tiha ona iha ne'e: "Ida ba hotu no hotu ba ida... naksalak la'os opsaun ida!".

No ho mote ida ne'e, ha'u deklara Kongresu Nasionál da-3^okona-ba Edukasaun Repúblika Demokrátika Timor-Leste nian taka.

Kmanek wa'in.

17 maiu 2017

Dr. Rui Maria de Araújo